



Albert Cavegn-Deplazes, Sedrun

naschius 16-08-1931

morts 05-11-2001

Avon biabein quater meins ha'l zenn grond dalla baselgia s. Vigeli annunziau cun tun lamentont la mort nunspetgada dil Betti sco el vegneva numnaus da tuts. Consterni e trests havein nus tuts patertgau vid il proverbi: «Oz en possa, damaun en fossa». Numnasontga e di dallas olmas eran gest vargai ed era il trapassau veva visitau ils logs da ses cars sin santeri. Secapescha ha el buca sminau dad esser denter quels en paucs dis suenter. In incaps egl intern ha raffau nies car Betti cun cuorta dimora el spital a Cuera en las sferas perpetnas. Gronda dolur e tristeza per sia cara consorta Maria ed affons, frars e sora sco era a tutts parents ed amitgs tujetschins ed ordeifer.

Cuort schatg dalla cuorsa terrestra.

Gl'Albert ei naschius ils 16-08-1931 ensemens cun siu frar Vinzens, pia schumellins. Tgei legria e plascher a ses cars geniturs havend dus en tgina . Cun ses frars e sora ha Betti passentau ina ventireivla affonza el ravugl d'ina buna famiglia cristiana. Suenter ver frequentau las scolas primara e reala ha il giuven fatg gl'emprendissadi da miradur e pli tard absolviu la scola da polier. In bien mistergner anfla adina laver. Ses plazs da laver ein stai els giuvens onns spatitschai. Tujetsch, Aridermatt, Erstfeld e schizun Genevra. Ses patruns, interpresas da baghegiar Murer SA e Loretz SA. Da-pertut ha el surviue e luvrau per cumpleina cuntentientscha. Cun siu fin caracter, gentila demanonza, responsabladad e luvrusadad ei Betti staus in exempl sil plaz da laver. Duront in triep onns ha el schizun sez giu firma da construcziun aulta e bassa. Vesend che sias forzas vegnevan strappazzadas memia fetg cun atgna fatschenta ha el calau ed ei turnaus tier la firma Murer SA sco polier tochen tier la beinmeritada pensiun.

Gl'onn 1966 marida Betti cun la giuvna Maria Deplaz da Rueras. La ventireivla lètg vegn benedida cun in buob e duas buobas. Il sulegl en casa, mo era laver e quitau. Il

bien bab e consorta han schau muncar nuot a lur affons ed eduau quels cun bien exempl e pietusadad.

Valurs da plascher duess mintga carstgaun haver. Savens vesev'ins il Betti cun sia consorta a viandar e contemplar ia biala natira. Turas pli grondas e pintgas. Per cuort'uriala sunar harmonia. Zambergiar e construir edifecis da muntada en Tujetsch en miniatura era dad el in inschign aparti. Certins ein stai exponi en vitrina Tgèsa communal. Dar ina paterlada e star da cumpignia era in deletg, el cun in bien cor, bona luna e bia humor. Negin vegneva unfis da sia vischinonza. Quellas bialas uras vegnan a muncar.

Mo ussa ei il Betti buca pli. Nus tuts sperein e cartein ch'el sappi guder sco engraziament per siu engaschi terrester la pasch celestiala. Alla preziada consorta, affons e tuts curascha e forza da purtar la crusch adossada dil Tutpussent.
Betti, stai bein e ruaussa en pasch.